

---

# KLOSCHTER ~ RÄBE

FASNACHT 2004

---

Sujet:

## Rollstäge-Lämbbe

Dr Hansli Meier vom hindere Wiisedamm,  
faart am Samschtig am Moorge mit em Dram,  
vo Glaihyynige via Glyybeggstrooss – Glaarablatz,  
iiber Klosterrääbige, dr Stainebürg uff zer Äsche-BAZ  
und will im Baanhoof e Billjee go uusedruggige,  
fir dr Zug z'nää via Grälligen no Duggige.  
D Aazaigedaafele zaigt em, er haig gnueg Zyt,  
und uff e Perron isch's schyyn't's au nit wyt,  
es längt mer - maint dr Hansli – es'git mer nyt z'due,  
jetz faar y no Duggigen - in aller Rueh!

Dr Hans leest si Billjee no Duggige und zrugg,  
do gits em s eerscht mool im Hirni e Bugg!  
Wel dr Billjee-Bryys, wo dr Beamti duet uuseloo,  
normalerwyys längt fir in d Ferie z goo!  
(Wel dr Billjee-Bryys, wo dr Beamti duet verlange,  
eppe glyych hoch isch, won er isch in d Ferie gange.)  
Doch är zaalt ooni z Muurre und dänggt sich derbyy,  
s wird halt alles dyyrer, jää - das wird wool soo syy!  
Mit em Billjee in dr Hand luegt er ummenand  
und gseet in dr Schaltherhallen e Schild an dr Wand,  
wo druff stoot, ass die won e Zug wänn bestyyge,  
uff e Basserelle mien – falls si Schwindelfrei syyge!

Uff DIE Basserelle kunnt nur - wär mit Doodesmuet,  
e superschnälli, gaili Rollstääge bedrätte duet.  
Die Rollstääge fäggt mit zää Meter pro Sekunde  
und gumpsch oobe nit drab, bisch grad wiider dunde!  
Au dr Hansli fasst Muet und er gumpf uff die Stääge,  
denn schletzt's en uff e Ranze und scho griegt er dr Sääge.  
D Sanitääät isch denn koo und git em Baldrian-Tee,  
si sin nit dr Ainzig, so Fäll hämmer immer wie mee.  
Dr Hansli fasst zämme, in de letschde Zuggige,  
jetz bin uf dr Basserelle aber noonig in Duggige!

Noo drei Daag hän's em scho d Fäade uusegnoo  
und en mit Valium doopt und em gsait s'sygg e soo:  
Wenn er wirgglig mechti uff Duggige goo,  
no kennt men iihn am nägschte Dagg uuseloo  
und em zaige wien er vo dr Basserellen oobe  
uff em Perron drey unde - aakunnt - Zoobe.  
Me het em au gsait, s schläggt's kai Gaiss vom Disch,  
ass es uff Duggige mit em Auti vyyl schnäller isch!  
Doch dr Hansli uus Glaihyynige het umsverworgge  
Mit em Zug no Duggige welle - non em Zmorge!

Am vierte Daag isch dr Hansli vo dr Basserelle-Sanitääät,  
an DIE Rollstääge gschellt worde, won iin aabebringe däät,  
uff e Perron drei, won am halber Zääni - e volle  
Zug, in Richtig Grällige – no Bäärn soll rolle!  
Doch grad won er d Rollstääge het welle bedrätte,  
stoosst en von hinde – son e Liebe, Digge, Nätte,  
ain won uusgseet wien e Waalvisch, zwar noonig ganz,  
doch mit grosser Schnuuren und dr Räschten isch Schwanz,  
won em Hansli sait - mit rooten Auge - so gluggige,  
wenn jetz nit durab rollsch - kunsch nie uff Duggige!

Uff aimool schloot's dä Digg saudigg oobenaabe  
und duet dr Hans total under sich begraabe.  
So landet dr Hansli Meier – zää Minute spööter,  
scho wiider bim glyyche Root-Gryz-Sanitööter  
Dä frogt en, jetz dien si mir alles gnau verzelle,  
si sin doch dää, wo vor fünf Daag uff Duggige het welle?  
Mi guete Maa, nämme si d Rollstäägen uff d Basserellen uff,  
si hän e viertelstund Zyt und kenne dooben no ain suffe,  
denn nämme si die nägscht Rollstääge under d Bai,  
denn iire Zug uff Duggige stoot uff em Perron zwai!

Dr Hansli bedanggt sich bi sym Baanhoof-Retter  
und glaubt scho är sygy e Rollstääge-Jetter.  
Är verwitscht aber uf dr Basserelle die falschi Rolli,  
nämmlig die - wo iin statt aaben – uffebriinge solli  
und deert kollidiert er mit däm Digge und syner Schnuure,  
Dasch dä Digg, wo bekanntlig au uff Duggige will pfluere.  
Jetz liige si näbenander, dr Hansli und dr Schwanz  
und si rolle mit tää-tüü ins Spittel - mit dr Ambulanz.  
No in dr Narkoose het dr Hansli dr Doggter gfrogt,  
eb er jetz äntlig im Zug no Duggige hoggt?

Drei Daag speeter het me dr Hans und dr Digg dernoo,  
denn uff aigeni Verantwortig uus em Spittel entloo,  
mit dr Empfäälilig, falls si doch no uff Duggige welle,  
kääm me vom Gundeli häär, diräggt uf d Basserelle  
und denn nur DIE Rollstääge nää, wo abwärts goot,  
falls dr Zug uff Duggige no uff em Perron stoot.  
Jetz ändlig het dr Hans begriffe was Schiggsal isch,  
Won är vor de diefe Pfütze stoot mit em digge Visch,  
dä sait: „Hogg uff mi Rugge, mit ainere Schwanzschlaagzuggig,  
schwimm y uff d Basserelle und denn haue mers ab uff Duggig!

No zää Daag seggle si jetz gmainsam iiber d Basserelle,  
doch bevoor si d Rollstääge hän aabe welle,  
frogt dr Hansli dr Digg, es sin baidi schampar ghetzt,  
het's denn do nienen e Lift, won uffen und aabe schletzt?  
Do maint dr Digg, es haig ain, äär haigs vom e Grytiker,  
dä sygg aber nur fir dr Architäggt und syyni Politiker.  
Also haue si's iiber d Rollstäägen uff e Perron zwai  
und styngen in Zug no Duggige, si sin im Zug fascht elai.  
Noo Ääsch teent's us em Lutsprächer, me kenn Sandwich kauffe  
und dr Zug faart diräggt vo Grällige ooni Halt bis uff Lauffe!

---

D Wääge und Requisite ka me bi dr Kasärne go bschauen  
D Ladärne-Uusstellig isch wie allewyl vom Mäntig zoobe bis  
am Mittwoch demorge uff em Münschterplatz

Lueg au unter: [www.kloschterräbe.ch](http://www.kloschterräbe.ch)

---